

# CYMWYSTERAU CYMRU

## POLISIÂU A GWEITHDREFNAU RHEOLEIDDIO

### POLISI CYMWYSTERAU BLAENORIAETHOL CYFYNGEDIG

#### Rheoli fersiynau

Cymeradwywyd y fersiwn (1) hon o bolisi Cymwysterau Blaenoriaethol Cyfyngedig Cymwysterau Cymru ar 22 Gorffennaf gan Fwrdd Cymwysterau Cymru.

Mae adran 47(1)(b) o Ddeddf Cymwysterau Cymru 2015 (y "Ddeddf") yn ei gwneud yn ofynnol i Gymwysterau Cymru gyhoeddi datganiad o'i bolisi mewn perthynas ag arfer ei swyddogaethau o dan Ran 4 o'r Ddeddf, sy'n cynnwys darpariaethau ynghylch cymwysterau blaenoriaethol cyfyngedig. Bydd Cymwysterau Cymru yn adolygu ei ddatganiadau polisi a baratowyd dan adran 47 o'r Ddeddf, ac os bydd o'r farn ei bod yn briodol, yn dilyn adolygiad, bydd yn paratoi datganiadau diwygiedig. Bydd Cymwysterau Cymru yn adolygu'r ddogfen hon o leiaf unwaith y flwyddyn. Gallai adolygiad o'r fath ystyried effeithiolrwydd y polisi a'i gymhwysedd parhaus. Disgwylir i'r datganiad hwn gael ei adolygu nesaf erbyn 3 Awst 2017 fan bellaf.

Croesewir adborth ar y polisi hwn ar unrhyw adeg. Anfonwch eich sylwadau i [policy@qualificationswales.org](mailto:policy@qualificationswales.org).

#### Egwyddorion cyffredinol y polisi cymwysterau blaenoriaethol cyfyngedig

Bydd y polisi hwn o ddiddordeb i gyrrff dyfarnu, pawb sy'n defnyddio cymwysterau yng Nghymru a Llywodraeth Cymru. Mae'n egluro sut mae Cymwysterau Cymru yn arfer ei swyddogaethau mewn perthynas â chyfyngu ar gymwysterau.

O dan y Ddeddf, ni chaiff ysgolion, sefydliadau na chyflogwyr yng Nghymru ond gynnig cwrs a ariennir gan Weinidogion Cymru neu awdurdod lleol yng Nghymru i ddysgwyr o dan 19 oed sy'n arwain at gymhwyster sydd wedi'i gymeradwyo neu'i ddynodi (oni fydd Gweinidogion Cymru wedi caniatáu eithriad).

Mae Adran 13 (Dyletswydd i baratoi rhestr o gymwysterau blaenoriaethol) yn amlinellu dyletswydd Cymwysterau Cymru a Gweinidogion Cymru i baratoi rhestr o gymwysterau blaenoriaethol ar y cyd. Gellir cynnwys cymhwyster ar y Rhestr pan fydd Cymwysterau Cymru a Gweinidogion Cymru wedi eu bodloni bod sicrhau a chynnal hyder y cyhoedd yn y cymhwyster yn flaenoriaeth i Cymwysterau Cymru, oherwydd arwyddocâd y cymhwyster gan roi sylw i anghenion dysgwyr a chyflogwyr yng Nghymru.

Mae adran 14 (Cymwysterau blaenoriaethol cyfyngedig) o'r Ddeddf yn rhoi i Cymwysterau Cymru y pŵer i gyfyngu ar gymwysterau blaenoriaethol. Wrth benderfynu cyfyngu ar gymhwyster, rhaid i Cymwysterau Cymru ystyried ei brif nodau o dan y Ddeddf a dau amcan – osgoi anghysondeb rhwng ffurfiau gwahanol (neu 'fersiynau') ar yr un cymhwyster, a galluogi Cymwysterau Cymru i arfer dewis rhwng cyrrff dyfarnu gwahanol neu rhwng ffurfiau gwahanol ar gymwysterau.

Os bydd Cymwysterau Cymru yn fodlon ei bod yn ddymunol cyfyngu ar nifer y ffurfiau ar gymhwyster blaenoriaethol a gaiff eu cymeradwyo i uchafswm (sef un neu fwy), mae dau lwybr ar gyfer cymeradwyo cymhwyster blaenoriaethol cyfyngedig. Os dilynir y llwybr cyntaf, a nodir yn adran 15 (Pŵer i wneud trefniadau i ddatblygu cymhwyster blaenoriaethol cyfyngedig) ac adran 16 (Cymeradwyo cymhwyster blaenoriaethol cyfyngedig a ddatblygwyd yn unol â threfniadau adran 15) o'r Ddeddf, bydd Cymwysterau Cymru yn dod i drefniant cytundebol gyda chyrff dyfarnu i ddatblygu ffurf newydd ar gymhwyster blaenoriaethol cyfyngedig a gaiff ei gyflwyno wedyn i Cymwysterau Cymru i'w gymeradwyo. Mae Cymwysterau Cymru yn cyfeirio at y llwybr hwn fel y llwybr 'comisiynu'. Os dilynir yr ail lwybr, a nodir yn adran 17 (Cymeradwyo cymhwyster blaenoriaethol cyfyngedig yn absenoldeb trefniadau adran 15), bydd Cymwysterau Cymru yn cymeradwyo un fersiwn neu ragor o gymhwyster o blith y rheini a gyflwynwyd i'w cymeradwyo. Mae Cymwysterau Cymru yn cyfeirio at y llwybr hwn fel y llwybr 'dethol'. Bydd y polisi hwn yn gymwys i'r ddau lwybr hyn oni nodir yn wahanol.

Nod y polisi hwn yw egluro'r canlynol:

- y rhesymau dros gyfyngu ar gymwysterau blaenoriaethol;
- y broses a ddefnyddir i gyfyngu ar gymwysterau blaenoriaethol.

### **Cymwysterau Blaenoriaethol Cyfyngedig**

1. Mae adran 14 o'r Ddeddf yn caniatáu i Cymwysterau Cymru gyfyngu ar gymhwyster sydd ar y Rhestr Cymwysterau Blaenoriaethol ("y Rhestr").<sup>1</sup> Gall Cymwysterau Cymru ystyried p'un a ddylid cyfyngu ar gymhwyster sydd ar y Rhestr ai peidio. Bydd hyn yn cyfyngu ar nifer y ffurfiau gwahanol (neu 'fersiynau') ar gymhwyster y gellir eu cymeradwyo ar unrhyw adeg.
2. Gellir cyfyngu ar gymwysterau blaenoriaethol os bydd Cymwysterau Cymru yn fodlon ei bod yn ddymunol gwneud hynny, gan ystyried y prif nodau ac amcanion sef:
  - osgoi anghysondeb<sup>2</sup> rhwng ffurfiau gwahanol ar yr un cymhwyster (drwy gyfeirio at y lefel cyrhaeddiad a nodir gan ffurfiau gwahanol ar yr un cymhwyster, neu fel arall)
  - galluogi Cymwysterau Cymru i arfer dewis rhwng cyrff dyfarnu gwahanol neu ffurfiau gwahanol ar gymhwyster fel y'i hamlinellir o dan adran 14(4) o'r Ddeddf.
3. Wrth benderfynu pa gymwysterau y dylid cyfyngu arnynt, bydd Cymwysterau Cymru yn ystyried ein prif nodau, sef sicrhau bod cymwysterau a'r system gymwysterau yng Nghymru yn effeithiol o ran diwallu anghenion rhesymol dysgwyr yng Nghymru a hyrwyddo hyder y cyhoedd mewn cymwysterau ac yn y system gymwysterau yng Nghymru. Gall Cymwysterau Cymru nodi cymwysterau

---

<sup>1</sup> Gellir cynnwys cymhwyster ar y Rhestr pan fydd Cymwysterau Cymru a Gweinidogion Cymru wedi eu bodloni bod sicrhau a chynnal hyder y cyhoedd yn y cymhwyster yn flaenoriaeth i Cymwysterau Cymru, oherwydd arwyddocâd y cymhwyster gan roi sylw i anghenion dysgwyr a chyflogwyr yng Nghymru.

<sup>2</sup> Gallai anghysondeb ymwneud â phryder ynglŷn â nifer o faterion er enghraifft, cynnwys neu fethodoleg asesu.

y dylid cyfyngu arnynt o bosibl drwy amrywiaeth o ffynonellau, gan gynnwys adolygiadau sector, ymgysylltu â rhanddeiliaid a gwaith ymchwil i'r farchnad.

4. Mae'r canlynol yn enghreifftiau o sefyllfaoedd lle gall Cymwysterau Cymru ystyried cyfyngu ar gymhwyster blaenoriaethol. Nid yw'r enghreifftiau hyn yn hollgynhwysfawr:
  - lle mae angen cynnwys penodol o ran cymwysterau yng Nghymru oherwydd gofynion cwricwlaidd neu bolisi datganoledig ac y byddai'r cyfyngiad hwnnw yn cefnogi'r hyfywedd economaidd i gyrrff dyfarnu ddatblygu cymwysterau o'r fath i Gymru;
  - lle mae angen trefniadau asesu penodol (gan gynnwys, er enghraifft, asesu drwy gyfrwng y Gymraeg) yng Nghymru oherwydd gofynion cwricwlaidd neu bolisi datganoledig ac y byddai'r cyfyngiad hwnnw yn cefnogi'r hyfywedd economaidd i gyrrff dyfarnu ddatblygu cymwysterau o'r fath i Gymru;
  - lle mae Cymwysterau Cymru yn nodi bod yr anghysondeb rhwng y gwahanol ffurfiau presennol ar yr un cymhwyster yn sylweddol ac yn achosi problemau.
5. Bydd Cymwysterau Cymru yn ystyried p'un a oes angen cyfyngu ar gymhwyster ac i ba raddau y dylid cyfyngu ar y cymhwyster fesul achos. Bydd ystyriaeth o'r fath yn seiliedig ar amrywiaeth o ffynonellau gwybodaeth gan gynnwys adolygiadau o'r ddarpariaeth bresennol, adborth gan randdeiliaid, gwaith ymchwil i'r farchnad. Wrth ystyried p'un a ddylid datblygu cynnig i gyfyngu, bydd Cymwysterau Cymru yn ystyried yr opsiynau sydd ar gael ac yn gwerthuso eu heffeithiolrwydd i gyflawni'r nodau a'r amcanion a amlinellir yn mhwyntiau 2 a 3.
6. Os bydd Cymwysterau Cymru yn cynnig cyfyngu ar gymhwyster, cyn gwneud hynny bydd yn hysbysu pob corff cydnabyddedig, ac unrhyw bartion eraill y bydd Cymwysterau Cymru o'r farn y gellid disgwyl yn rhesymol iddynt fod â diddordeb yng nghanlyniad y cynnig. Gall 'partion eraill' gynnwys y darparwyr dysgu sy'n cofrestru ymgeiswyr ar gyfer cymwysterau, megis ysgolion, Sefydliadau Addysg Bellach, cyrff sector a darparwyr dysgu seiliedig ar waith.
7. Gall yr hysbysiad fod yn rhan o ymgynghoriad ehangach ac asesiad o effaith. Bydd hefyd yn cynnwys pwnc y cyfyngiad arfaethedig, y rhesymeg dros y cyfyngiad arfaethedig, tystiolaeth ategol a gwybodaeth am y trefniadau sy'n gysylltiedig ag unrhyw gyfyngiad y mae Cymwysterau Cymru yn ei ystyried.
8. Cyn rhoi cyfyngiad ar waith, bydd Cymwysterau Cymru yn ystyried unrhyw sylwadau a gyflwynir iddo gan ymatebwyr i'r ymgynghoriad mewn perthynas â'r cynnig.
9. Pan fydd corff dyfarnu wedi gwrthwynebu'r cyfyngiad arfaethedig, ni fydd hyn yn rhagfarnu canlyniad unrhyw broses gomisiynu neu ddethol ddilynol. Lle y gall unrhyw gorff dyfarnu ddangos er boddhad rhesymol Cymwysterau Cymru fod perygl o ragfarnu, caiff hyn ei reoli drwy gamau priodol, er enghraifft, drwy sicrhau bod dyletswyddau i'r staff dan sylw yn cael eu gwahanu lle y bo'n briodol.

10. Bydd Cymwysterau Cymru yn cyhoeddi penderfyniad am gymhwyster blaenoriaethol cyfyngedig fel sy'n ofynnol gan adran 14(5) o'r Ddeddf. Caiff y penderfyniad ei gyhoeddi drwy nodi ar y Rhestr o Gymwysterau Blaenoriaethol y cymwysterau neu'r disgrifiadau o gymwysterau y mae Cymwysterau Cymru yn bwriadu cyfyngu arnynt. Bydd penderfyniad yn nodi uchafswm nifer y ffurfiau ar y cymhwyster a all gael eu cymeradwyo ar unrhyw un adeg a gall nodi a yw Cymwysterau Cymru yn bwriadu mabwysiadu'r llwybr comisiynu neu'r llwybr dethol mewn perthynas â'r cymhwyster blaenoriaethol cyfyngedig. Heb beryglu rhyddid Cymwysterau Cymru i ddewis y naill llwybr neu'r llall yn ôl ei ddisgresiwn, y llwybr comisiynu sydd fwyaf tebygol o gael ei ddewis lle bo angen datblygu cymhwyster newydd i ddiwallu anghenion dysgwyr yng Nghymru. Mae'r llwybr dethol yn fwy tebygol o gael ei ddewis lle mae nifer o gymwysterau sy'n bodoli eisoes a allai fod yn addas at y diben ond lle mae anghysondebau sy'n ei gwneud yn ddymunol i osod cyfyngiad. P'un ai'r llwybr comisiynu neu'r llwybr dethol a ddefnyddir, bydd cyrff dyfarnu yn cael eu dewis drwy gystadleuaeth agored, deg a thryloyw.

11. Os bydd Cymwysterau Cymru wedi cyfyngu ar gymhwyster blaenoriaethol, mae ganddo'r pŵer i wneud y canlynol:

- dod i drefniant gyda chorff dyfarnu i ddatblygu ffurf newydd ar gymhwyster blaenoriaethol cyfyngedig (adran 15) y gellir ei gymeradwyo (adran 16) – mae Cymwysterau Cymru yn cyfeirio at hyn fel y llwybr 'comisiynu'; neu
- cymeradwyo'r ffurf ragnodedig (ffurfiau rhagnodedig) ar gymhwyster y cyfyngir arno heb ymrwmo i drefniant gyda chorff dyfarnu (adran 17) – mae Cymwysterau Cymru yn cyfeirio at hyn fel y llwybr 'dethol'. Gall hyn gynnwys dethol cymwysterau sy'n bodoli eisoes o blith y rhai a gyflwynwyd wedyn i'w cymeradwyo gan gyrff dyfarnu cydnabyddedig.

12. Mae adran 23 (Cyfnod para'r gymeradwyaeth) o'r Ddeddf yn nodi y bydd Cymwysterau Cymru yn cymeradwyo'r cymhwyster blaenoriaethol cyfyngedig am gyfnod a bennir wrth roi'r gymeradwyaeth, ac mae Cymwysterau Cymru yn rhagweld y byddai hyn am gyfnod o hyd at 5 mlynedd fel arfer.

13. O leiaf flwyddyn cyn dyddiad dod i ben cymhwyster blaenoriaethol cyfyngedig, bydd Cymwysterau Cymru yn adolygu amcanion y penderfyniad cychwynnol ac yn ystyried a ddylid cymhwyso cyfyngiad arall. Os cynigiwn y dylid cymhwyso cyfyngiad arall bydd Cymwysterau Cymru yn dilyn y broses a amlinellir ym mharagraffau 6-12 uchod: bydd corff dyfarnu yn cael ei ddewis drwy gystadleuaeth agored, deg a thryloyw unwaith eto.

### **Comisiynu Cymhwyster Blaenoriaethol Cyfyngedig newydd**

14. Mae adran 15 o'r Ddeddf yn darparu y caiff Cymwysterau Cymru ymrwmo i drefniadau gyda chorff dyfarnu i ddatblygu ffurf newydd ar gymhwyster blaenoriaethol cyfyngedig a bod yn rhaid iddo baratoi cynllun ynghylch gwneud trefniadau o'r fath. Mae Cymwysterau Cymru yn cyfeirio at hyn fel y llwybr 'comisiynu'.

15. Rhaid i Cymwysterau Cymru baratoi a chyhoeddi cynllun ar gyfer comisiynu cymwysterau sy'n agored, yn deg ac yn dryloyw. Bydd y cynllun yn nodi'r weithdrefn gyffredinol y bydd Cymwysterau Cymru yn ei dilyn, a gellir ei ategu â dogfennaeth sy'n benodol i bob cyfyngiad posibl. Yn gyffredinol, lle mae Rheoliadau Contractau Consesiwn 2016 yn gymwys i'r comisiwn, bydd Cymwysterau Cymru yn gweithredu yn unol â'r Rheoliadau hynny. Ym mhob achos arall, bydd Cymwysterau Cymru yn cymhwyso ei weithdrefn ei hun. Yn y naill achos neu'r llall, gwneir hyn drwy broses ymgeisio fesul cam, gan gymhwyso egwyddorion tryloywder, dim gwahaniaethu a thriniaeth gyfartal. Pan fydd y comisiwn i ddatblygu'r cymhwyster wedi ei ddyfarnu, bydd Cymwysterau Cymru yn goruchwyllo gwaith y corff dyfarnu a gomisiynwyd yn fanwl wrth iddo ddatblygu'r cymhwyster. Caiff y gwaith goruchwyllo hwn ei gyflawni drwy reoli contract yn fanwl yn ogystal â bod yn rhan o benderfyniadau allweddol ynglŷn â chynnwys pwnc a methodoleg asesu.
16. Lle mae Rheoliadau Contractau Consesiwn 2016 yn gymwys, caiff ymgeiswyr aflwyddiannus wneud cais i'r llys i herio dyfarniad y contract(au) os credant fod y Rheoliadau wedi cael eu torri. Nodir y broses a'r terfynau amser yn Rhan 5 o'r Rheoliadau.
17. Unwaith y bydd cymhwyster blaenoriaethol cyfyngedig a gomisiynwyd wedi'i ddatblygu gan gorff dyfarnu, rhaid ei gyflwyno i'w gymeradwyo gan Cymwysterau Cymru a fydd yn adolygu'r cymhwyster yn erbyn y meini prawf cymeradwyo perthnasol y mae Cymwysterau Cymru wedi'u cyhoeddi o dan Adran 20 (Meini prawf cymeradwyo) o'r Ddeddf. Os bydd y cymhwyster yn bodloni'r meini prawf cymeradwyo, caiff y cymhwyster ei gymeradwyo. Os na fydd yn bodloni'r meini prawf cymeradwyo, gofynnir i'r corff dyfarnu ddiwygio'r cymhwyster er mwyn bodloni'r meini prawf. Gall Cymwysterau Cymru ddynodi terfyn amser ar gyfer gwneud diwygiadau o'r fath. Gall methu â bodloni'r meini prawf cymeradwyo a/neu ymdrin â'r diwygiadau angenrheidiol o fewn y terfyn amser hwn arwain at derfynu'r comisiwn.
18. Dim ond cyrff dyfarnu a gomisiynwyd a gaiff gynnig y cymhwyster cyfyngedig, fel un "Cymeradwy", hyd nes y daw'r cyfnod cymeradwyo i ben (neu y caiff cymeradwyaeth ei hildio neu ei thynnu'n ôl). Bydd trefniadau trosiannol ar waith ar gyfer cymwysterau etifeddol er mwyn sicrhau na fydd dysgwyr sydd eisoes wedi dechrau cyrsiau sy'n arwain at gymwysterau etifeddol o dan anfantais annheg.
19. Ni fydd Cymwysterau Cymru yn dynodi unrhyw ffurf ar gymhwyster sy'n destun cyfyngiad neu gymhwyster sydd â'r un diben â chymhwyster blaenoriaethol cyfyngedig neu ddiben tebyg, yn ei farn ef, yn enwedig lle y gellid dewis cymhwyster arall yn lle cymhwyster blaenoriaethol cyfyngedig.

### **Dethol Cymhwyster Blaenoriaethol Cyfyngedig**

20. Mae adran 17 o'r Ddeddf yn nodi y gall Cymwysterau Cymru gymeradwyo ffurf ar gymhwyster sy'n gymhwyster blaenoriaethol cyfyngedig lle nad yw'n bwriadu ymrwymo i drefniadau o dan adran 15. Mae Cymwysterau Cymru yn cyfeirio at hyn fel y llwybr 'dethol'.

21. Rhaid i Cymwysterau Cymru baratoi a chyhoeddi cynllun ar gyfer dethol cymwysterau sy'n agored, yn deg ac yn dryloyw. Bydd y cynllun yn nodi'r weithdrefn gyffredinol y bydd Cymwysterau Cymru yn ei dilyn, a gellir ei ategu â dogfennau sy'n benodol i bob cyfyngiad posibl mewn perthynas â'r canlynol:
- gwneud ceisiadau am gymeradwyaeth o dan adran 17
  - sut y bydd Cymwysterau Cymru yn ystyried y ceisiadau hynny
  - y cyfnod cymeradwyo blaenoriaethol a'r meini prawf cymeradwyo a dethol i'w defnyddio.
- Defnyddir meini prawf dethol i alluogi Cymwysterau Cymru i ddewis rhwng y cymwysterau hynny sy'n bodloni'r meini prawf cymeradwyo.
22. Bydd Cymwysterau Cymru yn arfer ei swyddogaethau yn unol â'r cynllun a chan gymhwyso egwyddorion tryloywder, dim gwahaniaethu a thriniaeth gyfartal. Yn gyffredinol, lle mae Rheoliadau Contractau Consesiwn 2016 yn gymwys, bydd Cymwysterau Cymru yn gweithredu'n unol â'r Rheoliadau hynny. Ym mhob achos arall, bydd Cymwysterau Cymru yn cymhwyso ei weithdrefn ei hun. Bydd y broses yn ceisio caniatáu cyfnod cymeradwyo sy'n rhoi amser rhesymol i gyrrff dyfarnu baratoi cais.
23. Caiff cyrff dyfarnu apelio yn erbyn y penderfyniad dethol drwy ein Polisi Apeliadau Rheoliadol o fewn 20 diwrnod gwaith i hysbysiad o'r penderfyniad. Mewn achosion lle mae Rheoliadau Contractau Consesiwn 2016 yn gymwys, efallai y bydd gan Gyrrff Dyfarnu rwymedïau o dan y Rheoliadau hynny hefyd.
24. Dim ond cyrff dyfarnu a ddetholwyd a gaiff gynnig y cymhwyster cyfyngedig, fel un "Cymeradwy", hyd nes y daw cyfnod y cyfyngiad i ben (neu y caiff cymeradwyaeth ei hildio neu ei thynnu'n ôl). Bydd trefniadau trosiannol ar waith ar gyfer cymwysterau etifeddol er mwyn sicrhau na fydd dysgwyr sydd eisoes wedi dechrau cyrsiau sy'n arwain at gymwysterau etifeddol o dan anfantais annheg.
25. Ni fydd Cymwysterau Cymru yn dynodi unrhyw ffurf ar gymhwyster sy'n destun cyfyngiad neu gymhwyster sydd â'r un diben â chymhwyster blaenoriaethol cyfyngedig neu ddiben tebyg, yn ein barn ni, yn enwedig lle y gellid dewis cymhwyster arall yn lle cymhwyster blaenoriaethol cyfyngedig.

### **Meini Prawf Cymeradwyo ar gyfer Cymwysterau Blaenoriaethol Cyfyngedig**

26. Caiff meini prawf cymeradwyo ar gyfer cymwysterau blaenoriaethol cyfyngedig, boed yn rhai sydd wedi'u comisiynu neu wedi'u dethol, eu datblygu gan Cymwysterau Cymru mewn cydweithrediad agos ag arbenigwyr a rhanddeiliaid. Gall y broses o ddatblygu meini prawf cymeradwyo ar gyfer cymwysterau blaenoriaethol cyfyngedig a gomisiynwyd hefyd ystyried materion sydd wedi cael eu trafod a'u datrys â'r corff dyfarnu a gomisiynwyd o bosibl wrth ddatblygu'r cymhwyster.
27. Caiff meini prawf cymeradwyo a'r rheolau ar gyfer cyflwyno cymwysterau i'w cymeradwyo, boed yn rhai sydd wedi'u comisiynu neu wedi'u dethol, eu chyhoeddi.

### **Trefniadau trosiannol ar gyfer cymwysterau etifeddol**

28. Gellir rhoi trefniadau trosiannol ar waith lle y caiff cymeradwyaeth ei thynnu'n ôl neu lle y caiff dynodiad ei ddirymu ar y sail bod y cymhwyster neu'r disgrifiad o'r cymhwyster dan sylw bellach yn un cyfyngedig.
29. Gwneir trefniadau o'r fath yn unol â'r gofynion a'r terfynau amser a amlinellir yn Adrannau 27 (*Tynnu cymeradwyaeth yn ôl*) a 32 (*Dirymu dynodiadau adran 29*) o'r Ddeddf a chan ystyried yr angen i osgoi rhagfarn i bersonau sy'n ceisio ennill y ffurf hon ar gymhwyster, neu y gellid disgwyl yn rhesymol iddynt wneud hynny. Fel y cyfryw, bydd trefniadau trosiannol yn galluogi dysgwyr cofrestredig i gwblhau eu cymhwyster a gallant olygu y bydd ffurfiau presennol ar y cymhwyster yn parhau ar ôl penderfynu ar gyfyngiad er mwyn galluogi dysgwyr i gwblhau eu cymhwyster. Bydd gan drefniadau o'r fath ddyddiad terfyn pendant ac ni fyddant ar gael i ddysgwyr newydd sy'n cofrestru o'r 1 Medi yn ystod y flwyddyn ar ôl gwneud y penderfyniad i ddirymu.

### **Dirymu neu amrywio cymhwyster blaenoriaethol cyfyngedig**

30. Caiff Cymwysterau Cymru (yn unol â thelerau unrhyw gytundeb rhwng Cymwysterau Cymru a'r Corff Dyfarnu) ddirymu neu amrywio penderfyniad am gymhwyster blaenoriaethol cyfyngedig lle, er enghraifft, y tynnwyd ein sylw at y ffaith bod amcanion y penderfyniad wedi newid neu nad ydynt yn cael eu bodloni. Mewn achosion o'r fath, bydd Cymwysterau Cymru, cyn cyhoeddi unrhyw benderfyniad i ddirymu neu amrywio, yn:
- hysbysu pob corff cydnabyddedig, ac unrhyw bartïon eraill y mae Cymwysterau Cymru o'r farn y gellid disgwyl yn rhesymol iddynt fod â diddordeb yn y penderfyniad arfaethedig, am y cynnig (gan gynnwys y rhesymeg dros y cynnig).
  - ystyried unrhyw sylwadau a gyflwynir iddo gan y personau hynny mewn perthynas â'r cynnig.
31. Caiff cyrff dyfarnu apelio yn erbyn penderfyniad i ddirymu neu amrywio drwy ein Polisi Apeliadau Rheoliadol o fewn 20 diwrnod gwaith i hysbysiad o'r penderfyniad.

### **Polisiau Cysylltiedig**

32. Mae'r polisi hwn yn cyfeirio at:

- y Rhestr o Gymwysterau Blaenoriaethol ac at y meini prawf a ddefnyddir i gymeradwyo cymwysterau. Mae'r Rhestr o Gymwysterau Blaenoriaethol ar gael [yma](#). Caiff meini prawf cymeradwyo eu cyhoeddi o bryd i'w gilydd fel y bo'n briodol.
- asesu drwy gyfrwng y Gymraeg. Y Polisi Cymwysterau Cymraeg a Dwyieithog - <http://qualificationswales.org/media/1818/polisi-cymwysterau-rheoleiddiol-cymraeg-a-dwyieithog.pdf>
- y Polisi Apeliadau Rheoliadol - <http://qualificationswales.org/media/1896/160625-v20-regulatory-appeals-policy-cym.pdf>
- Rheoliadau Contractau Consesiwn 2016 - [http://www.legislation.gov.uk/uksi/2016/273/pdfs/uksi\\_20160273\\_en.pdf](http://www.legislation.gov.uk/uksi/2016/273/pdfs/uksi_20160273_en.pdf)